

NO. SOALAN : 69

**PEMBERITAHUAN PERTANYAAN DEWAN RAKYAT YANG
KETIGA BELAS, PENGGAL KEENAM, MESYUARAT PERTAMA**

PERTANYAAN : LISAN

**DARIPADA : DATO' JOHARI BIN ABDUL
[SUNGAI PETANI]**

TARIKH : 7 MAC 2018 (RABU)

Dato' Johari bin Abdul [SUNGAI PETANI] minta **PERDANA MENTERI** menyatakan berapakah nilai aset dan tunai yang di pegang oleh FELDA semasa FELDA berada di bawah Kementerian Koperasi dan Usahawan, dan berapakah pula nilai aset dan tunai FELDA pada bulan Disember 2017 semasa berada di bawah Jabatan Perdana Menteri.

JAWAPAN: YB DATUK SERI RAZALI BIN IBRAHIM,

TIMBALAN MENTERI DI JABATAN PERDANA MENTERI

Tuan Yang di-Pertua,

Untuk makluman Ahli Yang Berhormat, di awal penubuhan FELDA pada 1 Julai 1956, FELDA diletakkan di bawah Kementerian Pembangunan Luar Bandar. Seterusnya di bawah Kementerian Tanah dan Pembangunan Koperasi sehingga Mac 2004 dan bermula April 2004 FELDA diletakkan di bawah Jabatan Perdana Menteri. Menteri yang bertanggungjawab ke atas FELDA ialah Y.A.B. Dato' Sri Mohd Najib Tun Abdul Razak, Perdana Menteri Malaysia.

Semasa berada di bawah Kementerian Tanah dan Pembangunan Koperasi, jumlah Aset dan Tunai FELDA bagi tahun kewangan berakhir 31 Disember 2003 adalah sebanyak RM4,400.2 juta. Baki Tunai FELDA yang direkod pada tahun semasa adalah sebanyak RM3,671.7 juta manakala selebihnya merupakan jumlah aset FELDA, RM728.5 juta. Aset FELDA ini terdiri daripada aset tetap, pinjaman yang dikeluarkan oleh FELDA kepada syarikat Kumpulan, dan juga pelaburan dalam Syarikat Subsidiari dan Bersekutu FELDA.

Mulai tahun kewangan 2006, FELDA telah melaksanakan pemakaian Piawaian Pelaporan Kewangan atau *Financial Reporting Standards* ("FRS") dan mematuhi Pekeliling Perbendaharaan Malaysia PA3.1/2013 – Garis Panduan Untuk Penyediaan dan Pembentangan Laporan Tahunan dan Penyata Kewangan Badan Berkanun Persekutuan bagi tujuan penyediaan Penyata Kewangan tahunan yang diaudit. Seterusnya, FELDA telah mengguna pakai FRS 139 Instrumen Kewangan:

Pengiktirafan dan Pengukuran mulai tahun kewangan 2010 yang memerlukan pendedahan dalam Penyata Kewangan untuk mengambil kira nilai saksama (*fair value*). Nilai saksama merupakan anggaran rasional dan tidak berat sebelah daripada harga pasaran potensi yang baik, perkhidmatan atau aset. Anggaran ini mengambil kira penjejasan nilai apabila kos yang diakaunkan melebihi nilai saksama.

Oleh itu, dengan mengambilkira perkara di atas, berdasarkan kepada Penyata Kewangan Bagi Tahun Berakhir 31 Disember 2016 yang telah diaudit, jumlah Aset dan Tunai yang dipegang oleh FELDA adalah sebanyak RM24,572.61 juta. Baki Tunai FELDA yang direkod pada tahun semasa adalah sebanyak RM248.30 juta manakala selebihnya merupakan jumlah aset FELDA iaitu sebanyak RM24,324.30 juta. Aset FELDA ini terdiri daripada empat (4) kategori utama iaitu Aset Tetap, Pinjaman kepada Peneroka Dan Kakitangan, Pelaburan di dalam Syarikat Kumpulan FELDA dan Penghutang.

Sekian. Terima kasih.